



Biblioteka Jagiellońska.



*W. b. 365.*

5092



5092

CIMELIA

*W. b. 365.*  
5092



Conciones et orax. eulor.

Feol. 4896.

Locoloria Standolai, Concio de vestitu  
et fructu haeremont. Nivaa 1878


brat testat marti

Lib




5092












Wegr. Lym book  
ark. C

$\frac{2}{x} \overline{31}$

Esling







CONCIO,  
DE VESTITV  
ET FRVCTV HÆ-  
RESEON.



STANISLAI SOCOLOVII  
Concionatoris Regij.




*Cim. Gu. 5092.*



NISSÆ SILESIOVRVM,  
Excudebat Ioannes Cruciger,  
Anno 1578.

337.







# DE VESTITV ET FRVCTV HÆ- RESEON.

**A**TTENDITE A FALSIS  
Prophetis, qui veniunt ad vos in  
vestimentis ouium, intrinsecus autem  
sunt lupi rapaces. MATH. VII.



**A**Tor salutis nostræ **CHRIS-**  
**TVS** Dominus, nullam rem nobis  
magis cauendam, maioreq; studio ac  
diligentia declinandam esse, quàm fal-  
sos prophetas : quos Paulus ac reliqua Tit. 1.  
scriptura Hæreticos appellare solet, summa cautione,  
& monuit, & docuit semper. Attendite inquit à falsis  
Prophetis, qui veniunt ad vos in vestimentis ouium,  
intrinsecus autem sunt lupi rapaces. Nusquam scri-  
ptum legimus, attendite à Tyrannis, qui vos varijs  
tormentis, varijs cruciatibus à recta fide constantiq;  
proposito vestro deterrere conabuntur. Nusquam di-  
ctum est, Attendite à Iudæis, Gentibusq;, qui omnes  
conatus suos ad vos opprimendos, vestrosq; labores  
infricandos relaturi sunt : sed attendite inquit à falsis  
Prophetis. Cuius sux tam diligentis & exquisitæ cus-  
ræ duplicem reddit rationem. Primum propter illos

A ij

rum



## DE VESTITV ET

rum summam astutiam & calliditatem, qui inquit: **veniunt ad vos in vestitu ouium**, quod astutæ calliditatis est. Deinde propter summam crudelitatem, intus autem sunt lupi rapaces, quod violentissimæ cuiusdam rapacitatis esse censetur. Etenim ut eos ipsos scopu-  
*In vita Ba-* los magis declinare solemus, inquit Gregorius Nazia-  
*stij.* anzenus, qui sub aquis tecti delitescunt, quàm eos qui extant & eminent: ita & eos hostes maximè cauendos esse Christus Dominus præmonet, qui sicut latentes scopuli sub aquis, ita illi sub vestimentis ouium occultantur: & qui tum demum sese produnt, cum iam naus fracta, mercesq; dissectæ sunt. Cum præsertim,  
*Super Luc.* ut inquit Ambrosius: Caput petant, iugulum inuadant,  
*lib. 2. ca. 10.* vitalibus vulnus infligant. De quibus illud rectè vsur-  
*Mat. 10.* pari potest. Nolite timere eos qui occidunt corpus, animam autem non possunt occidere. Hos igitur diligentissimè fugiendos esse, salutis ac incolumitatis nostræ amator eximius, Christus Dominus, nunc admonet ac præcauet diligenter. Cuius cautionis cum superiore anno magnam partem explicauerimus, de vestitu tantum ouium, quo falsi Prophetæ tecti ad nos venire solent, ac de fructibus ex quibus dignosci possint, nunc aliquid dicendum erit. Ut ubi eos semel cognoueritis, iam tandem aliquando amare desinatis. Nemo autem hac nostra offendetur Oratione, nisi qui prius se suo iudicio hæreticum esse condemnarit. Cuius nostri propositi initium à diuini Numinis inuocatione capiamus.

Atten-



**Attendite à falsis Prophetis, qui  
veniunt ad vos in vestimentis o-  
uium, intrinsecus autem sunt lu-  
pi rapaces.**

Quis igitur hic vestitus ouium? quæ hæc tam mol-  
lia & insidiosa vellera, quibus falsi Prophetæ oues  
Christi decipiunt? Alij aliter iudicant. Quidam ora-  
tiones, eleemosynas, ieiunia, omnemq; vitæ continen-  
tiam, quam æquè boni ac mali simulare possunt, vel-  
lera Christi ouium appellare solent. Et re vera, hic ve-  
stitus semper sanctorum Dei, qui sunt oues Christi, pe-  
culiaris fuit. Quidam Cæremonias ecclesiasticas, om-  
nemq; externum cultum, indumenta ouium esse vo-  
lunt. Alijs omnis ille durior vestitus, quo Heremitæ,  
quo Monachi, omnes item illi qui asperiores vitam  
amplexi sunt vtuntur, lana ouium videri solet. Ve-  
rum nobis de re maximi momenti aliquid magis serium,  
quodq; cum summa rei melius conveniat, quærendum  
est. Cuius rei fundamenta indè iaciamus. Omnis Hæ-  
reticus, teste Hieronymo, hypocrita est, aliud agens,  
aliud simulans. Omnis porro hypocrita non suo, sed  
alieno indutus vestitu incedit, qui est virtutis & hone-  
statis, omniumq; eius partium simulatio. Cum igitur  
hæreticus quisq; hypocrita sit, duplicem habeat vesti-  
tum oportet. Alterum cum alijs hypocritis commu-  
nem: Alterum qui illi proprius & peculiaris sit. Com-  
munis vestitus erit, quod pium, quod honestum, quod



# DE VESTITV ET

cum virtute prima fronte coniunctum apparet: hæc enim omnibus hypocritis sunt communia, in quibus dici non potest, quantum veteres hæretici excelluerunt, quantum ieiunijs, orationi, quantum omni vitæ parsimonix & continentix studuerunt. Nunc ut virtute ipsa, ita & omni eius specie ac simulatione hæreses carent. At peculiaris vestitus quis, de quo nobis præsens est institutum? Dum totam scripturam expendo, dum omnem antiquitatem percurro, dum nostrorum temporum rationem diligenter intueor: non alium hunc vestitum inuenio, quàm ipsum Verbum DEI, Sacram denique scripturam, qua omnes errores suos, omnes fraudes, somnia, ineptias, ac deliramenta sua hæretici vestire ac ornare solent. Hoc ita esse, Primum veterum Pseudoprophetarum exemplum docet. Omnes enim illi veteris testamenti falsi Prophetæ, cum aliquid novum ad populum dicebant, semper illis utebantur verbis, hæc dicit Dominus: hæc dicit Dominus: cum se illud dicere Dominus pernegaret. Deinde hoc idem SALVator innuit ad finem huius Euangelij dicens:

*Mat. 7.* Non omnis qui dicit mihi, Domine Domine, intrabit in regnum coelorum, sed qui facit voluntatem Patris mei. Ac si diceret, Non omnis ille qui ingeminat more veteris legis falsorum Prophetarum, Domine Domine intrabit in regnum coelorum, sed qui voluntatem facit Patris mei. Quod Petrus paulò clarius explicat.

*1. Pet. 3.* Quemadmodum inquit Paulus frater noster charissimus ostendit in omnibus Epistolis, in quibus sunt quædam difficilia intellectu, quæ indocti & instabiles depravant, sicut & cæteras scripturas ad suam ipsorum



# FRUCTV HAERESEON.

ipforum perniciem. Depravabant autem vel falsa interpretatione, vel ipsius scripturæ inuersione, quorum nunc plena sunt omnia. Itaq; Diuus Ambrosius hac plena definitione hæreticos depingit. Hæretici sunt, qui per verba legis legem impugnant: proprium enim sensum verbis legis asstruunt, vt prauitatem mentis suæ legis autoritate commendent, Sciens enim impietas multum valere autoritatem legis, fallaciam sub nomine eius componit, vt, quia res mala per semetipsam acceptabilis esse non potest, bono nomine commendetur. Nam cum sciant Hæretici magnam esse Sacræ scripturæ autoritatem, idcō hac ipsa errores suos & deliramenta tegunt, suaq; testimonia minus valida, sacræ scripturæ autoritatibus allegant. Hæc Ambrosius. Idem ferè Vincentius Lirinensis, his verbis in libro de Antiquitate Catholicæ fidei docet. Quid est vestitus ouium: nisi Prophetarum & Apostolorum proloquia, quæ iidem quadam synceritate, agno illi immaculato, qui tollit peccatum mundi, tanquam velamenta quædam texuerunt. Qui sunt lupi rapaces: nisi sensus hæreticorum feri, & rabidi, qui caulas Ecclesiæ semper infestant, & gregem Christi quaquā possunt dilacerant. Sed vt facilius incautis ouibus obrepant, manente luporum ferocia, deponunt lupinam speciem, & sese diuinæ legis sententijs, velut quibusdam velleribus obuoluunt: vt cum quisq; lanarum moll ciē præsenferit, nequaquam aculeos dentium pertimescat. Hæc Lirinensis. Nemo ex veteribus hæreticis tam impurus, tam impius, nemo tam absurdus perditusq; fuit, qui non suum errorem ex his, quas nunc in manibus habemus, confirmaret.

Ambro. sua  
per epistol.  
ad Tit. cap.  
3. To. 3.



confirmaret scripturis. Videre hoc licet apud Irenes-  
um, Tertulianum, Epiphanium, cæterosq; qui eorum  
sententias argumentaq; retulerunt, & refutarunt. Non  
contentus erat vno & alio sacræ scripturæ loco ad sua  
confirmanda Martion: nisi vniuersum nouum Testa-  
mentum, omnesq; Pauli Epistolas suis accomodaret  
sententijs: ac si in opere incrustato & vermiculato,  
translatis lapillis ordineq; mutato ex homine faceret  
Vrsu aut Leonem, vt scripsit Irenæus. Plurimis locis  
scripturæ, minorem filium Patre iactitabat se demon-  
strare Arrius: Nestorius sacram scripturam se pri-  
mum, & solum intellexisse, & omnes illos ignorasse,  
quicunq; ante se magisterij munere præditi, diuina elo-  
quia tractassent, falsò solebat dicere. Ita vt Tertulianus  
alicubi Euangelium librum hæreticorum appellas-  
sit. Abunde hoc idem docet nostra ætas, quæ cum in  
sexcentas scissa sit hæreses, in sexcenta schismata: quæ  
tamen omnia vera esse non possunt, cum vna sit &  
simplex veritatis via: nulla tamen est, quæ non suum  
sacræ scripturæ testimonijs tueatur errorem. Et eò maz-  
gis quò absurdior, quò exitiosior est: quod in Anaba-  
ptistis Arrianisq; videre licet. Hic igitur est peculiaris  
Pseudoprophetarum vestitus: hæc mollia vellera, Non  
ieiunat quis, lupus est: vestitus autem ouium ille, Non  
quod intrat per os coinquinat hominem, sed quod pro-  
cedit ex ore hoc coinquinat hominem. Non orat quis,  
hic lupus est: vestitus autem, Orantes nolite multum  
loqui. Non vult quis subesse magistratui, lupus est:  
vestitus autem ouium, Obedire oportet Deo magis  
quàm hominibus, Confiteri peccata erubescit quis,  
lupus

Mat. 15.

Mat. 6.

Acto. 5.



FRUCTV HAERESION.

lupus est : vestitus autem ouium. Delicta quis intel- Psal. 18.  
 ligit : Continentiæ quis rumpit vota, lupus est : vesti-  
 mentum autem ouium. Non omnes capiunt verbum Mat. 19.  
 hoc. Non reddit quæ sunt Cæsaris Cæsari : quæ Dei  
 Deo, lupus est : vestitus autem ouium. Gratis habes Mat. 10.  
 tis, gratis date. Baptismum iterat, lupus est : vestis  
 autem ouilis. Qui crediderit & baptizatus fuerit, sal- Mar. 16.  
 uus erit. Minorem patre filium iactat, lupus est : ve-  
 stimentum autem. Pater maior me est. In nulla par- Ioan. 14.  
 te virtutis & honesti se exercet, lupus est : vestimen-  
 tum autem. Arbitramur hominem iustificari fide sine Rom. 3.  
 operibus. Pulsat quis pauperes, damnat innocuos, ex-  
 pilat vicos, & oppida, peregrinos & mercatores mer-  
 cibus expoliatur, lupus est : vestitus autem. Si autem im- Ezech. 18.  
 pius egerit poenitentiam &c. Misericordiæ Domini  
 multæ. Sed & cruces scelerum plurimæ. Hi sunt ve-  
 stitus Pseudoprophetarum, in quibus ad nos veniunt,  
 intus autem sunt lupi rapaces. Neque tamen ideò sac-  
 ra scriptura, aut accusanda, aut reijcienda est : aut  
 illa ad omnes errores conficiendos, omnemq; doctrin-  
 nam stabiliendam minus vtendum erit, quòd ea hære-  
 tici abutantur. Sed quemadmodum oues non ideò  
 vellera sua abijciunt, quòd eis aliquando lupi induti  
 conspiciantur : quin eò magis ea tuentur, atq; ab omni  
 luporum iniuria defendunt : ita etiam non ideò sacra  
 scriptura abijcienda erit, quòd hæretici ea ad suum &  
 aliorum exitium malè vtantur. Hoc tamen sciendum,  
 sub hoc vestitu lupum aliquando latere posse. Neq;  
 statim, vt quis aliquot scripturæ loca appellare potest,  
 eum sequendum esse : cum hic communis æquè lupis  
 B & ouibus,



& ouibus, vestitus esse possit. In quo genere Diabolus, hæc nostra tempora ita fascinauit, vt nemo tam absurdus doceat: modò Paulum vel Ioannem appellet, vt non hic statim quintus quidam Euangelista esse censeatur. Attendite igitur vobis à falsis Prophetis, qui veniunt ad vos in vestimentis ouium, intrinsecus autem sunt lupi rapaces.

Quomodo autem dignoscendi sunt, vbi sacra scripturæ allegatione non cognoscuntur, docet Euangelistum. Ex fructibus, inquit, eorum cognoscetis eos. At qui isti fructus? non idem sentiunt omnes, & res ipsa subobscurior est. Nostri temporis hæretici, sed & veteres referente Hieronymo, auaritiam, ambitionem, symoniam, luxum, vsuram, adulteria, ebrietatem, ac reliqua quæ carnem consequuntur vitia, eos fructus interpretantur. Quibus cum Ecclesiasticum Clerum placere diffuere vidissent: inde populo persuadere conati sunt, Clerum Ecclesiasticum falsos prophetas esse ex his fructibus dignoscendos. Fuit hoc ad vulgus, in cuius oculos tot, & tanta nostrorum incurrebant vitia argumentum efficacissimum: his talibus retibus, tanta irretita est hominum turba. Plausibile sanè argumentum, dolendumq; est Christiani mei, vobisq; in primis sacerdotes, vos tantum contra ordinem vestrum erexisse firmamentum: illiusq; vim in dies magis ac magis, immensa cupidate, ambitioneq; vestra augere. Hos tamen non esse veros fructus, ex quibus veri à falsis dignosci prophetæ possint, facile apparet. Partim quod hæc vitia cum hypocrisis pugnant: patent enim, & in oculos hominum incurrunt, nec benè cum vestitu  
ouium



FRUCTV HAERESEON.

ouium conueniunt. Nemo vnquam Arrio, nemo Photino adulterium, nemo ebrietatem obiecit: facile ab his cauent illi, qui nocentiora venena ferunt. Partim quod hæc labes omnium sunt temporum, siue hæreses vigeant, siue omnino sint nullæ. Quod enim vnquam tempus, tam felix, tam beatum fuit, quod his neuis Respub. Christiana caruerit? Itaque fructus potius carnis quàm hæreseos, hæc vitia scriptura nominare solet. Manifesta sunt, inquit Paulus, opera carnis, quæ sunt fornicatio, immunditia &c. in quibus, & ipsam recenset hæresim. Abundarunt hoc genere vitiorum, in veteri lege, Pontifices & sacerdotes: nusquam tamen eos scriptura, nusquam ipse Christus Dominus, in falsorum Prophetarum censum retulit. Caiphas Symoniacus sacerdos, futura tamen verè prædicit: expedit vnum hominem mori, ne tota gens pereat. Erat enim inquit Ioannes, Pontifex anni illius. Quid Iudas Sca-  
 riores? sed & ipsum Petrum reprehensibilem fuisse legimus. Verùm hæc sublata iam esse videtur controuersia. Ita enim isti, cum plerisque nostris in pari lance malitiæ constiterunt: æquè improbi, æquè sunt vitiosi: vt possint rectè inter se, alea iacere, vter melior. Itaque & ipsi non valde hunc locum vrgent: cum præsertim illo manifestissimo Christi testimonio conuincantur: super Cathedram Moysi sederunt scribæ & Pharisei, omnia ergo quæcunque dixerint vobis, seruate & facite: secundum autem opera illorum, nolite facere. Vel ipsis igitur testibus, magis proprium, magisque peculiare quid, quærendum erit. Fructus igitur hæreseos tales esse debent, qualis est ipsa Hæresis:

Gal. 5.

B ñ quæ



quæ cum non ad vnius hominis exitum, sed ad totius corporis Christi labefactionem comparata sit: fructus etiam eius illi erunt, non qui singulis noceant, sed qui ad totius corporis Christi, quæ est Ecclesia, ruinam & desolationem referantur. Fructus enim radici respondere debent. Radix totum inscit corpus: fructus igitur similes quærendi. Quos ipsa scriptura duos ex principibus Apostolis Iesu Christi: Paulus vas electionis, & Iudas frater Iacobi abundè explicant. Neque enim quicquam in hoc loco tam ancipiti, ex meo iudicio adserendum putavi.

Iud. in sua  
epistola,

Esa. 14.

Quorum primum, Iudas Apostolus, his recenset verbis, Dominationem inquit spernunt, Maiestatem autem blasphemant. Vt enim primus Apostata & hæreticus Lucifer, nimia arrogantia, contra Deum exaltatus, omnipotentis Dei dominationem spreuit, dum ei par per omnia esse vult: simulq; Maiestatem eius blasphemauit, cum inquit: Ponam sedem meam in Aquilone, & ero similis altissimo: Sic vniuersa pro pago, Schismatici & Hæretici, dominationem spernunt, Maiestatem blasphemant. Nunquam Martinus, nunquam Calvinus, Pontificem Romanum, cuius Cathedralis Apostolicam Sedem, omnis antiquitas sanctissimè appellauit, nisi Antichristum: nunquam Pontifices, nisi monstra & portenta: nunquam Sacerdotes, nisi Ministros & vasa diaboli: nunquam Reges & Principes Catholicos, nisi Pharaones, nisi tyrannos & libertatis publicæ oppressores appellare solent. Scripta illorum testantur, res negari non potest. Et cum auctoramentum Maiestatis lex sit, leges enim vos Principes magnos



FRUCTV HAERESEON.

magnos & admirandos faciunt. Omnisq; hæc vestra dignitas, & auctoritas ex legibus, tanquam firmissimo præsidio dependet: idem legum, qui & maiestatis hostes sint oportet. Hinc illa Ecclesiasticarum primum, deinde ciuiliū legum abrogatio: hinc patriarum constitutionum immutatio. Legibus enim integris & sacrotectis conseruatis: nequaquam neq; dominationem spernere: neq; Maiestatem blasphemare, impunè auderent: quinimo his stantibus & vigentibus ipsi nullo modo stare, ac sese diutius tueri possent. Primus itaq; fructus hæreseos est, dominationis & maiestatis diminutio, legum autem antiquarum abrogatio, ac plena extinctio. Quis hæc docet? Iudas Apostolus frater Iacobi. Dominationem, inquit, contemnunt, Maiestatem autem blasphemant.

Secundus eius mali qui ex hoc primo nascitur fructus, est Inobedientia. Væ væ, inquit idem Iudas, qui in contradictione Core abierunt. Quam contradictionem sic Moyse exponit: Core, Dathan & Abiron, Leuitici generis fratres: qui ad figendum deportandumq; tabernaculum, ac reliqua minutiora, cultus diuini officia erant destinati, Moyse & Aarone Principibus sacerdotum & Reipub. spretis, in munus & officium sacerdotale sese temerè ingesserant. Misit igitur Moyse, vt vocaret Dathan & Abiron filius Eliab: qui responderunt, non veniemus &c. Iratusq; est Moyse valde, dixit ad Dominum: Ne respicias Domine sacrificia eorum: tu scis, quod nec asellum quidem vnquam acceperim ab eis: nec affixerim aliquem eorum. Contradictio igitur Core, Inobedientia est, ac non

Num. 16.

B in

expectata



## DE VESTITV ET

expectata legitima vocatione, in alieni muneris functionem temeraria inuasio, quæ ex magistratus æstimatione leuissima nascitur. Qui fructus, an nostra ætate satis superq; his magistris & Doctoribus non refloruit: Mandat quid vniuersalis legitimè congregata Synodus, reclamat populus: non faciemus. Mandat Sacerdos, reclamat laicus: non faciemus. Mandat Rex, itidem subditi: non faciemus. Mandat Dux belli, reclamat miles: non faciam. Ab his autem maioribus ad minora est profectum: vt neq; seruus domino, nec filius patri, neq; vxor viro, nec discipulus officinæ magistro, aut parere aut subesse velit, sed omnes id faciunt, quod bonum esse videtur in oculis eorum. Quàm frequens hæc vox exauditur: non faciemus: non veniemus: ipsi videtis. Malæ igitur arboris hic est secundus deterior fructus, qui ex legum magistratusq; contemptu exoritur. Væ igitur væ, qui in contradictione Core abierunt.

Tertius autem ille. Nubes, inquit, sine aqua, quæ à ventis circumferuntur, fluctus feri maris, despumantes suas confusiones: sydera errantia, quibus procella tenebrarum seruata est in æternum. Quæ nihil aliud designant, quàm perturbationem omnis tam Politici, quàm Ecclesiastici ordinis, qui tertius est huius mali fructus. Quid enim nubibus vacuis, magis inordinatum: quid fluctibus maris, magis incompressum, quid ipsis syderibus errantibus, quæ nunc huc, nunc illuc feruntur magis incertum: Sequitur autem naturæ ordine, illos duos hic tertius fructus. Vbi enim nulla est obedientia, vbi nulla maioris vel minoris ratio & differena



8

FRUCTV HAERESEON.

Differentia, vbi superioris & inferioris nulla comparatio: ibi nullus certus ordo, nullus certus concentus sit oportet. Ex summis enim, & infimis, & medijs, moderata ratione interiectis, omnis emanat ordo. Quod vbi non est, ibi omnia incerta, omnia vaga, omnia fluctuantia, infinitisq; procellis & tempestatibus agitata sunt. Omnes apud istos Pontifices, omnes Sacerdotes, omnes Reges, omnes belli Duces, omnes Doctores, omnes omnia censeré volunt. Qua enim ratione, ordinem vllum inter se conseruabunt illi, qui sibi mutui sceleris conscij sunt: qui omnes ex æquo ab eo quod legitimum, quod cum veteri more coniunctum est recesserunt: quibus propria libido præest ac dominatur. In rerum igitur omnium confusione, quem tu ordinem inuenias?

Quem fructum ille quartus, vi & natura consequitur sua, quem idem explicat Iudas. Murmuratores & queruli, hoc est pacis & tranquillitatis publicæ perturbatores. Pax enim, vt doctissimis placet, nihil aliud est, quàm tranquillitas quædam ordinis. Vbi igitur nullus est ordo, sed potius omnis ordinis peruersio: ibi pax nullo modo esse potest. Rixæ, dissensiones, in mutuū exitiū conspirationes: hisq; domestici tumultus, bellaq; ciuilia, quibus nunc orbem terrarum ardere videmus, occupant omnia. Sexcentæ licet fiant confederationes, sexcentæ compositiones: pax tamen non erit. Pax enim tranquillitas est ordinis: quæ vbi non est, nulla item pax sit oportet, ipsa naturæ vi & æquitate ita concludente. Multum quidem valent humanæ sanctiones, multum leges: naturam



DE VESTITV ET

*Esa. 48. 57.* naturam tamen rerum inuertere & immutare non possunt. Non est pax impijs, dicit Dominus. Impij tanquam mare feruens, quod nunquam quiescere potest. Ita qui pacem inter Hæreticos, vel cum Hæreticis facere velit: nihil aliud agit, quàm arenam sine temperamento glutinat: quæ nunquam natura sua cohæret, nunquam diu in vnitatis vinculo permanere potest.

Obstat enim & impedit ille quintus qui sequitur fructus. Væ illis, qui in via Cain abierunt. Via Cain, summum quoddam & irreconciliabile odium, ex inuidia natum, omnemq; fraternæ charitatis abolitionem designat. Vbi enim nulla pax, ibi charitatem fraternam nullam esse oportet. Habetq; hæresis quoddam peculiare, ab alijs omnibus disinctum odium. Quærit Iosephus, quæ causa fuerit, cur cum reliquæ omnes gentes, in aliquam societatis vnionem, cum alijs nationibus venirent: Iudæi soli, nullam vnquam firmam & constantem amicitiam cum cæteris gentibus coluerunt. Reddit non aliam rationem, quàm disparitatem & dissimilitudinem cultus & religionis: odiumq; quod inde manat implacabile, cum illi vnum solum, alij omnes infinitos coluerint Deos. Demonstrat hoc idem Dionysius Areopagita, Geometrica quasi demonstratione, Vt, inquit, Linæ quanto remotius à centro discedunt, & numeri ab vnitate quanto magis distant: tanto etiam plus abinuicem separantur, maioreq; intervallo absunt. Sic homines, quanto magis à Deo, qui est rerum omnium primum principium & centrum, omnisq; vnionis fons & origo: veraq; de illo opinione discedunt: tanto magis à seipsis distant ac seiunguntur.

Nihil



## FRVCTV HAERESEON.

metuunt, & redire erubescunt faucij, semineces, semina uiui: quippe qui tantam veneni hauserint quantitatem, quæ nec occidat, nec digeratur: nec mori cogat, nec viuere sinat. Heu miseranda conditio, quantis illi curarum æstibus, quantis turbinibus exagitantur. Nunc etenim quæ ventus impulerit, incitato errore rapiuntur: nunc in semetipsos reuersi, tanquam contrarij fluctus reliduntur: nunc temeraria præsumptione ea quæ incerta videntur approbant, nunc irrationali metu, etiam quæ certa sunt expauescunt: incerti quæ eant, quæ redeant: quid appetant, quid fugiant: quid teneant, quid dimittant. Quæ quidem dubij & malè penduli cordis afflictio, diuinæ erga se miserationis est medicina, si sapiant. Idcirco etenim extra tutissimum Catholicæ fidei portum diuersis cogitationum quatiuntur, verberantur, ac penè necantur procellis, vt excussa in altum elatæ mentis vela deponant, quæ malè nouitatum ventis expanderant: seseq; intra fidissimam stationem placidæ ac bonæ matris reducant & teneant, atq; amaros illos turbulentosq; errorum fluctus primitus reuomant, vt possint deinceps viuæ & salientis aquæ fluentia potare. Dediscant benè, quod didicerunt non benè: & ex toto Ecclesiæ dogmate, quod intellectu capi potest, capiant: quod non potest, credant. Hæc ille.

Sequitur nonus ille letalis radicis letalior fructus, religionis vniuersæ cultusq; diuini ruina vltimumq; exitium. Quod iam non tam scripturæ testimonijs, quam re ipsa comprobandum est. Cum enim vniuersa fides ac religio Christiana, neq; demonstratione vlla nita-

D

tur, neq;



## DE VESTITV ET

tur, neq; sensui subiecta sit : sed sola fide, consensu auctoritateq; constet. His sublati aut saltem labefacti : omnem religionem auferri oportet. Hac potissimum ratione. Versatur quis inter Catholicos, audit argumenta, audit scripturas : venit item ad Sacramentarios, eadem omnia : item ad Anabaptistas, non infirmiora : ac Trinitarios Arrianosq; eodem modo. Quæ omnia, ex hisdem quasi scripturæ, recteq; rationis fontibus petita : cum animus infirmus, & Cauterius, coquere non potest : magna undiquaq; pondera rerum, & personarum dum videt : omnia simul, cum summo acerbioris dolore euomit : vniuersamq; abnegat fidem, ipsoq; infideli efficitur deterior, qualem nunc non vnum & alterum, sed plenos inter nos videmus versari greges : qui illud iam confiteri non erubescunt : se, quod in religione sequi debeant, planè nescire, omnia hæc falsa & conficta esse : religionis & pietatis, nihil præter speciosum nomen & titulum existere : & hæc quidem plurimi palàm : alij autem qui paulò moderatiores pudentioresq; sunt, cum palàm id affirmare non audeant, in corde tamen suo illud cum impijs occinunt, non est Deus, quorum numerus & multitudo ipsi Deo cognita est : esse tamen quàm plurimos, vita & mores hominum corruptissimi testantur. Euenerat hoc idem inter Philosophos quondam. Dum enim Reges ac maximi quiq; homines philosophabantur, grauiter tunc & seridè, omnes explicabantur philosophiæ partes : nihilq; affirmabatur nisi quod ex ipsius naturæ principijs, ac planè visceribus depromeretur. At posteaquam philosophia, ad homines

egentes



FRUCTV HAERESION.

egentes ostentationiq; deditos translata esset, qui eius finem, lucrum potius & questum, vanamq; gloriam, quàm veritatem sibi proponebant, tunc omnia ad nugas quasdam & ineptias, incredibiliaq; paradoxa translata sunt: quibus stultæ plebeculæ, illi ambitiosi magistri admirabiles videri voluerunt. Hinc illa omnia vnum esse, cœlum in perpetua quiete permanere, terram autem incitato cursu agitari, motum in rerum natura existeri nullum: hinc niuem nigram, & quid non quibus altercationibus eo res deducta fuit, vt nihil certò sciri aut affirmari posse existimaretur: illiq; sapientissimi esse iudicati sunt, qui nihil se nec magnum nec paruum scire profitebantur. Talis Socrates, talis Carneades fuit: Philosophi ipsi ex urbibus & ciuitatibus eiekti, planeq; tota ruisset philosophia, nisi illa duo sapientiæ lumina Plato & Aristoteles, rem planè collapsam seriò philosophando restituissent. Sic nimis um altercando, omnis amittitur veritas.

Vltimus est ille qui hæc omnia obsignat mala, tam exitiosi portenti fructus, vocata in dubium re omnium maxima & sanctissima Religione, leges item moresq; antiquos, virtutem, omneq; honestum in dubium vocari, quasi hæc hominum potius instituto & opinione, quàm natura & re ipsa valeant: sicq; omnis honesti rectæq; rationis habentis solutis, omniq; disciplina sublata à virtute ad vitia, non iam pedetentim & lento gradu, sed præcipiti cursu disceditur: sic omnis honesti alea iacitur. Hi sunt igitur illi quos quærebamus hæreseos proprii & peculiare fructus, non ex nostro ingenio vt videtis desumpti, sed ab ipsa scriptura

D ñ                      adumbrati,



## DE VESTITV ET

adumbrati, omnium autem temporum decursu exemplis comprobati. Sic igitur rem totam concludamus: si ante septuaginta ipsos vel octoginta annos hi tales fructus in ecclesia Catholica colligebantur, falsi tunc erant illi prophetæ, qui eam profitebantur doctrinam. Si autem tum in ea negligentia quam & ipsi videmus & isti tantopere accusant, nihil horum orbem vexabat Christianum. Nunc autem istis Ducibus & ea tam diligenti scripturarum vendicatione, hi fructus, tanquam ex quadam Epimethei Pandora promanarunt. Quid aliud dicemus, quam maiores nostros, parum quidem illos diligentes & continentes homines fuisse, falsos tamen prophetas nequaquam appellari debere: hos autem specie quidem pietatem & veritatem præferre, intus autem lupos rapacissimos esse. Vultisne vobis in meridie lucernam accendam? si iudicatum erit in meridie non lucere, hæc ita se non habent: si autem hæc verissima sunt, quid amplius desideratis in re præsertim tanti periculi? Hi enim fructus vitam singulorum perturbant, funestaq; labe inficiunt: Respub. evertunt, omnem autem pietatem & honestatem extinguunt. Eorum tamen malorum satores vos suspicitis, ac in delicijs habetis: in manibusq; planè portatis vestris: horum vita, fortunæ, tot confederationibus, tot præsidijs legum, tot Sacramentis, quæ iam officina ipsa Regi exprobrare non veretur, apud vos est sacrosancta: parumq; est quòd non puniuntur, sed aliundè etiam conquiruntur, sed publicis præmijs ac honoribus prouocantur, sed in ore ipso Regum atque Principum ea semina malorum iacere non erubescunt.

Persimilis



Persimilis hæc Aula est, diuturnæ febri, quæ nunquam  
 ægrum deserit, nisi prius aliquod vitium, tanquam si-  
 gnum & monumentum sui in ægro corpore reliquerit.  
 Sic nos nusquam venimus, vbi non aliquas reliquias  
 eius pestis & labis, inter eius loci & vrbis homines re-  
 linquamus. Ac vereor, ne etiam in hac ipsa ab ea la-  
 be, Dei munere, integerrima Vrbe, aliqua eius pestis  
 semina relinquamus, quæ postea in similes erumpant  
 fructus. Quæ omnia cui malo? Num verbo Dei,  
 num veritati? Nequaquam. Hæc enim manent in  
 æternum, his nulla malitia humana aut abrogare aut  
 derogare quidquam potest. Num Ecclesiæ Dei &  
 Regno Christi? Nequaquam: Hæc est enim columna  
 & firmamentum veritatis, ædificata in firma petra, *1. Tim. 3.*  
 contra quam, ne portæ quidem inferi quicquam præ- *Mat. 19.*  
 ualere possunt. Cui igitur malo? Rebuspub. quarum  
 hoc exitium, hic certissimus est interitus, Regibus ac  
 Principibus ipsis, quibus hæc omnia exedenda erunt,  
 quæcunq; isti diuini magistri intriuerint. Verum dicet  
 quis, hæc quidem de cæteris Sacramentariorum, Ar-  
 rianorum, Anabaptistarum sectis verissimè dici: Au-  
 gustanæ autem confessioni nequaquam convenire.  
 Cæterum vultisne meum de Augustana quod antea  
 nunquam retuli, audire iudicium? breuibus accipite.  
 Spero enim vos id quod ipsa res docet approbaturus.  
 Plus habet de velleribus ouium fructus autem persimis-  
 limos. Solent Plagiarij qui homines, vel ex littoribus,  
 vel ex oppidis suffurantur, cum ipsi omnibus illorum  
 locorum hominibus suspecti sint, habere secum quos-  
 dam vel ex illis ipsis oppidanis, vel saltim persimili  
 D in habitu



DE VES. ET FRV. HAERSEON.

habitu & vestitu adornatos: hos ex nauibus ad oppida vicina dimitunt vt familiaritate cum illius loci hominibus, atq; adeo pueris ipsis inita: eos ex oppidis in solum locum ad littora, tanquam inambulandi causa, educant. Quos vbi primum illi eduxerint, isti rapiunt ac in naues coniectos, secum in medios fluctus asportant: Plagiarij sunt persimiles ceteri haeretici: Augustana ipsa ex hoc genere hominum insidiosorum est, qui similitudine vultus & habitus, homines ex tuto Ecclesiae Catholicae sinu, in littora, Piratis obnoxia deducit: idq; propter eam similitudinem & vicinitatem quam se cum Catholica Ecclesia habere simulat, qua incautis & simplicibus hominibus facillime imponit. Exaudire enim licet illas voces: eandem hanc religionem esse, isdem principijs & fundamentis inniti, in cultu & ceremonijs nescio quid discrepare. Quos vbi semel ex loco tuto eduxerit, hunc Sacramentarius, illum Anabaptista, istum Arrianus, aut Trinitarius quispiam rapit: cum eoq; in ipsos exitiosissimos certissimae perditionis scopulos fugit. Quem enim isti funesti Plagiarij ex Augustanae sinu non rapuerunt? quem ista insidiosa Syren ex portu ecclesiastico non eduxit? aut quis ex istis Augustanam fidem à principio non erat sequutus? Habetis veram, vt puto, Augustanae formam & imaginem: si hoc idem res ipsa non docet, nolite credere: si autem veritatem dico vobis, quare non creditis mihi? Attendite igitur vobis à falsis Prophetis: sed maturè, priusquam hoc incendium ita augetur, vt postea, nisi vestra ruina extinguere non possit. Deus misereatur vestri, vt hoc tantum malum quod tot Respub. florentissimae perierunt, à vobis auertat, AMEN.



